

四庫全書

集部

欽定四庫全書

元氏長慶集卷五十一

唐元稹撰

序

白氏長慶集序

白氏長慶集者太原人白居易之所作居易字樂天樂
天始言試指之無二字能不誤具樂天與予書始既言讀書勤
敏與他兒異五六歲識聲韻十五志詩賦二十七舉進

士貞元末進士尚馳競不尚文就中六籍尤擯落禮部侍郎高郢始用經藝為進退樂天一舉擢上第明年拔萃甲科由是性習相近遠求玄珠斬白蛇等賦及百道判新進士競相傳於京師矣會憲宗皇帝冊召天下士樂天對詔稱旨又登甲科未幾入翰林掌制誥比比上書言得失因為賀雨秦中吟等數十章指言天下事時人比之風騷焉予始與樂天同校秘書之名多以詩章相贈答會予謫掾江陵樂天猶在翰林寄予百韻律詩

及雜體前後數十章是後各佐江通復相訓寄巴蜀江
楚間洎長安中少年遞相倣倣競作新詞自謂為元和
詩而樂天秦中吟賀雨諷諭等篇時人罕能知者然而
二十年間禁省觀寺郵候牆壁之上無不書王公妾婦
牛童馬走之口無不道至於繕寫模勒銜賣於市井或
持之以交酒茗者處處皆是

楊越間多作書模勒樂天
及予雜詩賣於市肆之中

也其甚者有至於盜竊名姓苟求自售雜亂間廁無可

奈何予於平水市中

鏡湖傍
草市名

見村校諸童競習詩召而

問之皆對曰先生教我樂天微之詩固亦不知予之為微之也又云雞林賈人求市頗切自云本國宰相每以百金換一篇其甚偽者宰相輒能辨別之自篇章以來未有如是流傳之廣者長慶四年樂天自杭州刺史以右庶子詔還予時刺會稽因得盡徵其文手自排綴成五十卷凡二千一百九十一首前輩多以前集中集為名予以為陛下明年秋當改元長慶訖於是因號曰白氏長慶集大凡人之文各有所長樂天之長可以為多

矣夫以諷諭之詩長於激閒適之詩長於遣感傷之詩
長於切五字律詩百言而上長於瞻五字七字百言而
下長於情賦贊箴戒之類長於當碑記叙事制誥長於
實啟表奏狀長於直書檄詞策剖判長於盡總而言之
不亦多乎哉至於樂天之官族景行與予之交分淺深
非叙文之要也故不書長慶四年冬十二月十日微之
序

記

永福寺石壁法華經記

按沙門釋惠皎自狀其事云永福寺一名孤山寺在杭州錢塘湖心孤山上石壁法華經在寺之某所始以元和十二年嚴休復為刺史時惠皎萌厥心卒以長慶四年白居易為刺史時成厥事上下其石六尺有五寸短長其石五十七尺有六寸座周於下蓋周於上堂周於石砌周於堂凡買工鑿經六萬九千二百有五十錢經之數經既訖又成二石為二碑其一碑凡輸錢於經者

由十而上皆得名於碑其輸錢之貴者若杭州刺史吏部郎中嚴休復中書舍人杭州刺史白居易刑部郎中湖州刺史崔元亮刑部郎中睦州刺史韋文悟處州刺史韋行立衢州刺史張聿御史中丞蘇州刺史李又御史大夫越州刺史元稹石司郎中處州刺史陳蛄九刺史之外搢紳之由杭者若宣慰使庫部郎中知制誥賈餗以降無不附於經石之列必以輸錢先後為次第不以貴賤老幼多少為先後其一碑僧之徒思得聲名人

文其事以自廣予始以長慶二年相先帝無狀謹於同
又明年徙會稽路出於杭杭民競相觀睹刺史白怪問
之皆曰非欲觀宰相蓋欲觀曩所聞之元白耳由是僧
之徒誤以予為名聲人相與日夜攻刺史白乞予文予
觀僧之徒所以經於石文於碑蓋欲相與為不朽計且
欲自大其本術今夫碑既文經既石而又九諸侯相率
貢錢於所事由近而言亦可謂來異宗而成不朽矣由
遠而言則不知幾萬千歲而外地與天相輒陰與陽相

蕩火與風相射名與形相滅則四海九州皆大空中一
微塵耳又安知其朽與不朽哉然而羊叔子識枯樹中
舊環張僧繇世世為畫師歷陽之氣至今為城郭狗一
叱而異世卒不可化鍛之子學數息則易成此又性與
物一相遊而終不能兩相忘矣又安知夫六萬九千之
丈刻石永永因衆性合成獨不能為千萬劫含藏之不
朽耶由是思之則僧之徒得計矣至於佛書之妙與僧
當為予言不當為僧言况斯文止於紀石刻故不及講

貫其義云長慶四年四月十一日浙江東道都團練觀察處置等使通議大夫使持節都督越州諸軍事越州刺史兼御史大夫上柱國賜紫金魚袋元稹記

翰林承旨學士記

舊制學士無得以承旨為名者應對顧問叅會旅次班第以官為上下憲宗章武孝皇帝以永貞元年即大位始命鄭公為承旨學士位在諸學士上居在東第一閣乘輿奉郊廟輒得乘厩馬自浴殿由內朝以從揚羅竿

布大澤則丹鳳之西南隅外賓客進見於麟德則止直
禁中以俟大凡大誥令大廢置丞相之密畫內外之密
奏上之所甚注意者莫不專對他人無得而參非自異
也法不當言用是十七年間由鄭至杜十一人而九參
大政其不至者衛詔及門而返事適然也禁省中備傳其事至
於張則弄相印以俟其病間者久之卒不典命也已若
此則安可以昧陋不肖之稔繼居九丞相二名卿之後
乎俛仰瞻睹如遭大賓每自誨其心曰以若之不俊不

明而又使欲惡歆曲攻於內且決事於冥冥之中無暴
揚報効之言不忿行私易也然而陰潛之神必有記善
惡之餘者以君父之遇若如是而猶舉枉措直可乎哉
使若之心忽而為他人盡數若之所為而終不自愧斯
可矣昔魯共王餘畫先賢於屋壁以自警臨我以十一
賢之名氏豈直自警哉由是謹其遷授書於座隅長慶
元年八月十日記

元氏長慶集卷五十一

欽定四庫全書

元氏長慶集卷五十二

唐 元稹 撰

碑銘

沂國公魏博德政碑

陛下以元年正月壬戌詔臣稹曰朕有臣弘正自魏入鎮魏人思之因守臣懇狀其德政乞文爾司予言其文以付臣拜稽首退而奏書於陛下曰始安祿山以玄宗

四十三年盜幽州兵劫擊郡縣踰關據京天下掉撓肅宗征之海內甫定而夾河五十餘州或服或叛更立迭奪廢置征伐朝覲賦入之宜皆自為意五紀四宗容受隱忍田承嗣始有魏博相衛貝瀋之地承嗣卒以其地傳兄子悅悅傳緒緒傳季安既而季安悍誕淫驕風勃蠱蠹發則喜殺左右漸及於骨肉往往顧妻子曰安用此由是內外惴悸妻元氏因人不忍移置他所餘一月乃卒是歲先皇帝元和之七年八月也季安子懷諫始

十餘歲衆襲故態名為副大使而家臣蔣士則逆虐用
事士衆不分服日夜相告曰田中丞興博大孝敬於軍
謹廉讀儒家書好言君臣事儻可依倚為將帥乎聞者
皆踴躍一朝牙旗下衆來捧附興仆地不肯起衆亦不
肯去乃大言曰爾輩即欲用吾語能不殺副大使且許
吾取天子恩澤洗汝痕穢使千萬衆知君臣父子之道
從我乎皆曰諾遂殺蔣士則等十數人以興知留後事
移懷諫於外明年歸之朝蓋七年之十月四日也興乃

圖六州之地域籍其人與三軍之生齒自軍司馬已下
至於郡邑吏之廢置盡獻於先帝先帝詔興以工部尚
書長魏博相衛貞澶之地仍勅司封郎中知制誥裴度
使於興且以錢一百五十萬緡賜其軍曲赦管內使百
姓一年勿復事問者羸賑乏困改前政之不以法者魏
之人相喜曰歸天子乃如是耶興又悉取魏之僭服異
器人臣所不當為者斥去之先帝曰興吾六州善心者
田興也使興弘吾至正不亦可乎因名曰弘正先是魏

諸賓猶僕役也將卒無畏避弘正始求副節度以下於
朝至則迎迓承奉功雖勲將莫不乘者避謁者趨付授
咨度始用賓禮先是諸將之外有權者莫不拘劫妻子
以為固四方之來聘問者莫不防礙出入以為密士吏
工賈限其往來人多懼愁稀復會聚至是皆曠然矣魏
之人又相喜曰人之生不當如是耶滑以水害聞於朝
請移河於衛之四十里且役衛工三萬餘詔弘正議之
皆曰壞吾地役吾人以利他邑古無有也弘正曰魏於

滑信彼此矣朝廷何異焉不時興工以教人讓魏俗不
又先帝多之以右僕射就加焉十三年又加司空以子
布之會蔡有勞也是歲李師道燒河陰驚洛邑陰通元
濟詔弘正誅之明年破賊五萬於東阿進收鄆之陽谷
距其城四十里營焉二月壬戌劉悟斬師道加司徒平
章事復歸於魏其年八月朝京師先帝待之有加焉乞
留不獲詔加侍中以遣之又明年陛下以成德喪師詔
弘正入馬初王武俊以戰朱滔功得有趙地傳子孫凡

三十九年矣至承宗為盧從史李師道所誣誤先皇帝
征而赦之者再憂畏感慙不克來覲既而聞陛下天覆
海深悉包悉受乃果自信將朝有時未行會病將歿以
志付其弟承元聽命於朝陛下語宰相曰弘正在魏吾
何患焉即日內出五詔詔弘正為中書令節度於鎮且
詔父子皆為帥以大其威十一月甲寅成德獻狀曰弘
正自去魏魏人哭之鎮人歌之奉宣詔條除去僭異猶
魏政也且臣聞之德之至者有二政之大者有三三政

一曰仁為惠政二曰法為善政三曰謙為和政二德一
曰忠為令德二曰孝為吉德今弘正獻魏博六州之地
平淄青四代之寇入鎮冀不測之泉可以為忠矣祖考
食宗廟父子分土疆兄弟羅軒冕可以為孝矣始初山
東鍵閉東縛泳而游之歌而舞之可以為仁矣始初山
東逼越廢怠裁而制之舉而用之可以為法矣始初山
東傲狠侵取地以讓之功以助之可以為謙矣謙法仁
孝資之以忠不曰德政謂之何哉臣請奉制以一百九

十二字付守臣懋銘之石用申約束銘曰

帝命弘正予言是聽理亂有數其道甚明亂則隱約理
由亂生既理復亂生於翫輕唐受天命海內承平高祖
太宗不荒不寧玄宗抑厄其否乃革四十三年奄有不
宅始視燕寇胡雛弄兒雖我寵重彼將胡為所細所忽
忽焉而懼四后垂顧山東不夷逮我聖父殷憂儉克乘
其淫驕乃伐乃殛爾視羣孽胡為而亡僭久而大頑昏
暴狂爾亦自視胡為而昌憂畏逼側永思悠長曩爾之

無今爾之有既克而有在克而守惟爾惟我而今而後
爾雖穹崇無忘辱詒我雖平寧無忘燕寇銘之戒之以
永聲臭

唐故開府儀同三司檢校兵部尚書兼左驍衛
上將軍充大內皇城留守御史大夫上柱國南
陽郡王贈某官碑文銘

南陽王姓張氏諱奉國本名子良以某年月日薨于家
其子爰哭於其黨曰唐制三品以上歿既葬碑於墓以

文其行我父當得碑家且貧無以買其文卿大夫誰我
肯哀者由是因其舅捧南陽王所受制詔凡八通歷抵
卿大夫之為文者予與焉予故聞南陽王忠功每義之
然其請明日子岌狀其故聞官闕以告曰我南陽西鄂
人我高祖盈左武衛將軍閑廐使我曾祖蘭朝散大夫
沙州別駕我祖景春朝請大夫太僕少卿我父南陽王
太僕府君之第某子也少學讀經史子至古今成敗之
言尤所窮究遂貫穿於神樞鬼藏之間而盡得擒縱弛

張之術矣大歷末始以戎服事郭汾陽於邠建中中以騎五百討希烈於蔡遭太夫人喪號叫請罷遂克終制僕射張建封以壽帥移於徐始以渦口三城授於我僕射歿而徐師亂子乘亂以自立王不忍討以師二萬歸于潤德宗異之詔召至京授侍御史復職於浙西就加御史中丞又加國子祭酒是元和之元年也二年李錡叛王擒之以獻加檢校工部尚書兼右金吾衛將軍御史大夫上柱國進封南陽郡王食實封一百五十戶遂

錫嘉名尋遷檢校刑部尚書充振武麟勝等州節度營
田觀察處置等使復以刑部尚書兼左金吾衛將軍御
史大夫歷左龍武統軍鴻臚卿就加檢校兵部尚書轉
左驍衛上將軍充大內皇城留守以疾薨壽八十三特
詔贈某官我南陽郡夫人能氏祖元皓皇朝禮部尚書
左金吾衛將軍進國公岌與嵩南陽夫人之二子也嵩
任某官岌以某官奪喪制葬以某年月日於某地岌不
肖能言先將軍之職官而不能知先將軍之勲業矣乞

為碑予按僕射張建封以貞元十六年薨於徐徐人立其子惜求命南陽王不義其所為以渦之衆盡棄去由是泗濠之守皆據郡惜不能令卒帖徐由南陽王之斷其臂也元和之二年潤帥錡求覲京師既許之不克覲辱中貴人殺其臣寮以令下楊帥錡以叛告朝廷甚憂之初錡筦鹽於潤有年矣削虐暴狠其下甚畏之而庫庾之藏以億計潤之師故南韓晉公之所教訓弩勁劍利號為難當是時初定蜀兵始散物力未完加誅於錡

甚難之憲宗皇帝不得已下誅詔不決日露章自潤曰
十月十二日錡就擒從亂者無遺餘問其狀則曰錡既
叛以是月十一日命南陽王田少卿李奉仙率銳衆以
圖池南陽王喜養士又能為逆順言明日與二將誓所
部迴討錡城守不敢出環其城是夕攻愈急錡衆壞散
縋于城下遂就擒自是南陽王勲名顯於代性卑順不
伐在振武時以檢儉同士卒勞苦居餘官皆謹慎專至
如不及在朝廷十餘年似無功能者未嘗圖進取薨之

日家甚貧幾無以葬其身天子憐之廢視朝賻布帛給班劔鼓吹以葬之嗚呼舉三十年為言其間至將相者凡百數耳目相逮之後非其子孫能識其姓名者十不能一二焉若南陽王縛錡棄愔全徐完潤自取爵位以貽不朽無幾希矣碑於其墓不亦宜乎銘曰

在昔徐師知于南陽付授兵柄以俾為防徐喪其帥徐人恃强强以愔嗣不歸其喪我欲盡殄愔亦與亡不忍自我焚其構堂我或不去愔盡必猖斷其右臂其能久

長乃挈萬衆賓于陴疆愔果惴惴不假不狂逮及終歿
全歸其吭潤錡待我不踰于行一日叛命肆其昏荒我
乃遽取歸之天王非不可殺示人不戕報愔以惠報錡
以常稱示厚薄俾之相當克勇克義不伐不揚銘于墓
石以永無彊

元氏長慶集卷五十二

欽定四庫全書

元氏長慶集卷五十三

唐 元稹 撰

碑銘

唐故越州刺史兼御史中丞浙江東道觀察等
使贈左散騎常侍河東薛公神道碑文銘

天下萬族言多大冠冕人物者凡八姓薛其一也自晉
安西將軍懿避寇汾陰後世子孫遂與裴氏柳氏為河

東三著姓近世諸薛羣從伯季死喪猶相功縷者數十人迭居中外要秩皆邠州刺史寶胤之二世三世孫公諱戎字元夫父曰湖州長史贈刑部尚書同母曰贈某郡太夫人陸氏尚書景融女祖曰河南縣令贈給事中兼河南於邠州為季子刑部五男又終郎丹終賓客擁終御史公實刑部府君第某子今尚書兵部侍郎集賢殿學士放於公為季弟公初不樂為吏徒以家世多貴富門戶當有持之者會兩弟相繼舉進士皆中選公自

喜遂入陽羨山年四十餘不出李衡為刺史能以禮下
公及衡觀察江西求公為幕中賓公許衡衡遷復為觀
察使齊映乞自佐映卒湖南觀察使李異遽辟之未幾
福建觀察使柳冕奏署書下詔公判冕觀察府中事累
遷殿中侍御史冕俾公攝行泉州刺史事時貞元中罷
重方鎮方鎮喜自用不用朝廷法公在郡用朝廷法不
用冕所自用者冕惡之先是宦者薛盈珍譖馬總為泉
州別駕冕諭公陷總總無罪公不忍陷冕怒并囚之值

冕病俱得脫公由總以義聞冕卒闕濟美代冕使福建復請公副團練事始受五品服濟美使浙東公亦隨副之轉侍御史給事中穆質有直氣愛公稱於朝因拜尚書刑部員外郎改河南令王師出征以中貴人護諸將州府吏迎迓館穀畏不及持畚鍤於道路者相接唯公境內按故道塗無所役且制關閘無得授留守卒壞公制公命寘諸獄留守怒遣將率徒略出之公不與卒致留守諸市人皆賴之遷衢州刺史到所部視前刺史所

為皆便俗公忻然無所改不周月而政就移刺湖州其
最患人者荻塘河水渚淤逼塞不能負舟公濬之百餘
里改刺常州不累月遽刺越州仍以御史中丞觀察團
練浙東西所部郡皆禁酒官自為壚以酒禁坐死者每
歲不知數而產生祠祀之家受酒於官皆醕偽滓壞不
宜復進於杯棬者公即日奏罷之舊制包橘之貢取於
人未三貢驚者罪且死公命市貢之驚者無所禁旬月
之內越俗無餘弊朝廷宜之積累歲不遷長慶元年以

疾自去九月庚申薨于蘇州之私第始生歲丁亥至是
七十五年矣天子廢視朝使使者贈賵賻祭臨且以左
散騎常侍追加焉十一月庚申洎夫人韋氏葬偃師河
南府君之墓左公後娶李夫人亦又歿于天子曰沂始
九歲洽次之有女四人皆及其嫁公始以隱者心為吏
不尚約束不求名譽人人便安尤惡苛雜為郡時有善
歸之所部縣為鎮時有善歸之所部郡是以在郡在鎮
時無灼灼可驚人者然既去人思賦歛多饒裕而儉於

用予視其庫庾案牘盈羨無逋負予在中書時公既歿浙東使上公所羨之財貫緡積帛之數凡三十有九萬則其去他郡也可知矣惜乎今之人揚善政者少公既不目稱人亦莫能盡知公之所以理至於脫馬總之禍抗居守之略弛酒禁市貢橘惠施於人而歿而盈羨皆予之適知者非公之不能有以多於此也性誠厚溫重然而歡愛親戚及為大官遠近多歸之衣食婚嫁之外無餘財一旦盡所有分遺親戚曰吾病矣爾輩各為歸

去資親戚故舊皆哭泣盡散去及公去越之日徒御不
過數十人觀者嗟歎多出涕公為河南令余以御史理
東臺自是熟公之所為又嘗與公季弟放為南北曹侍
郎公歿矣非我傳信孰當傳焉銘曰

婉婉邠州厥生九子子又生孫實大以祉祉延于公有
浙之東仲氏臨汝季氏南宮門戶有赫有赫斯融我祿
斯美我族斯豐朋舊親戚羈離困窮無遠無邇有來斯
雍公之喪矣族亦瘁止分散丹車各自鄉里有今之季

悲哀不已前年孟亡今年仲死撫視遺孤瞻望墳壘何以推之古今同此貽之斯文以永來祀

故中書令贈太尉沂國公墓誌銘

長慶二年某月某日司禮氏持第一品慝弩已下備衛椎鉦鼓鳴鏡簫笳笛前導我沂國公洎某國夫人某氏合葬于某縣某鄉某里某原先是沂國嗣子肇乞予銘墓石按沂國公姓田氏諱某字某平州盧龍人曾祖璟官至鄭州別駕祖延憚官至安東都護府司馬沂國既

貴贈尚書右僕射父庭玠官至銀青光祿大夫相州刺史中丞沂國既貴贈累至司空公本諱興司空第某子幼敏雋年十八為魏博衙前都知兵馬使自是魏劇地劇職盡更之由太子賓客沂國公累加殿中御史侍御史中丞祕書監元和七年同節度副使步射之衆皆隸焉魏帥季安卒子懷諫始十餘歲惡輩樹之不累月魏法大壞一旦萬衆相呌噪皆曰田中丞當為帥公曰叱叱止止衆曰何謂也公曰爾輩牽制孺子猶一累吾焉

能受爾輩即欲受吾使用我乎皆曰諾公曰孺子之家
敢有辱者死擅殺人者死掠財者死天子未命敢有言
吾麾節者死訖吾世敢有不從吾忠孝者死汝輩可乎
皆曰可公乃狀其事於先帝先帝大悅降工部尚書魏
博相衛貝瀘六州節度度支營田觀察處置制刻節以
授之而又賜緡錢赦死罪復租入公乃獻地圖編口籍
修職貢上吏員凡魏之廢置不關於有司者悉罷軍司
馬已下皆請命於廷然後斬暴亂叙勞舊除僭異弛禁

閉家家始以燈火相會聚親戚吉凶通弔問出入無所詰魏之人老者聞見平時多出涕少者不知所以然百辟四方皆奉賀明年錫嘉名又明年加僕射十三年子布功於蔡加司空十四年帥師克東平加司徒平章宰相事八月朝京師乞侍從先帝付以山東加侍中實封以遣之十五年會上新即位成德表帥上曰非吾勲賢莫可入者轉中書令以往焉是日命子布節度河陽以張之公既入鎮去就事法猶在魏魏之人相與立石

乞文于陛下陛下詔臣稹為文以付之先是瀛之樂壽
博野入於鎮公乃奏歸之長慶元年七月幽州亂公即
日命將悉帥麾下集於境鎮人初受制未慣用於王是
月二十八日潛作亂公薨於師年至五十八天子震悼
罷五日朝冊贈太尉下詔徵天下兵且命子布脫縗經
總魏師以自報兵勢未合布冤憤自殺遂罷討三年鎮
人歸其喪詔葬有加焉嗚呼魏之法虐切疑忌諸將以
才多死者公既故為刺史子又多才好讀書識理亂形

勢孝友信義士衆多附服官望已重不宜免然而晦養
謹慎不下二十年訖無禍用是建大勲更大鎮模樣聲
名施於後世身以忠歿子以孝歿累累在墳下者如公
幾何人公若干男若干女子布終魏博節度使子肇鳳
翔府少尹子肇某將軍子某某官子某某官女邵氏某
氏婦近世勲將尤貴富者言李郭然而汾陽西平猶不
得父子並世為節制公與子布同日登將壇諸子泊伯
季龜緇金銀被腰佩者十數人不亦多乎哉銘曰

忠乎仁乎可以用於彼而不可用於此乎何魏人之不
我以異而鎮人之不與我為徒化養弘而為血辨青旂
於葦蒲感異物之先兆豈人力之能圖送橫之客歌薤
露于嗟沂公今已乎


唐故京兆府藍屋縣尉元君墓誌銘

唐藍屋縣尉諱某字某姓元氏於有魏昭成皇帝為十
四世孫曾曰尚食奉御某祖曰綿州長史贈太子賓客
某父曰都官郎中岳州刺史某母曰某望閭夫人妻曰

隴西李氏女子曰某曰某女曰某君始以蔭入仕四仕
為藍屋尉丁太夫人憂遂不復仕享年五十五以疾歿
於衢州元和十五年四月某日歸祔於咸陽縣之某鄉
某里君少孤力學通五經書善鼓琴能為五言七言近
體詩事親愉愉然終身不忘嬰兒之慕奉兄恭恭然若
童子之愛敬臨弟姪妻子煦煦然窮年無慍厲居官以
謹廉貞順而仁愛寮友之悍誕鄙異者游于君則必怡
然無自疑于我矣嗚呼總是數者非古之所謂淑人君

子歟不壽不達命適然也是月二十一日猶子晦跪于
予曰某日孤子震襄祔事請銘于季父由是銘銘曰

或仁而夭或鄙而壽天乎不識人乎安究我之北原五
世其墓子子孫孫前後左右歿有令人乃克來祔斯焉
克終亦又何疚



元氏長慶集卷五十三

欽定四庫全書

集部

元氏長慶集卷

五十四至
六十

詳校官監察御史臣查瑩

檢討臣何思鈞覆勘

總校官知縣臣繆琪

校對官中書臣雷純

謄錄監生臣錢敬熙

欽定四庫全書

元氏長慶集卷五十四

唐 元稹 撰

碑銘

有唐贈太子少保崔公墓誌銘

公諱倭字德長以孝公

按唐書崔沔官太子賓客贈禮部尚書謚孝

為從祖

父則其官族可知也沔弟濤官至大理少卿濤生儀甫

官至大理丞贈刑部侍郎公即刑部之第某子母曰范

陽盧氏贈本郡太君公再娶前夫人滎陽鄭之尚女後夫人范陽盧國倚女封范陽郡君七女三男三女既嫁鄭出也兩男三女出於盧逞千牛廼明經迅挽郎公以長慶三年二月四日薨於洛陽時邕里壽至七十一年官至戶部尚書贈太子少保階至正議大夫勲至上柱國爵至安平縣開國男紫服金魚之賜其尚矣葬以某年十一月之某日於某地公始以太廟郎再任為東陽主簿刺史李衡一以自得衡遷湖南賓置之府罷授宣

州錄事參軍觀察使崔某狀為南陵會南陵賦錢三萬
稅輸之戶天地相遠不可等級由是歲累逋負人被鞭
迫而又屠牛鑄錢則殺吏卒莫敢遽止者公始至怙怙
然無約束適有屠牛鑄錢之徒敗覺者盡窟穴誅之羣
盜皆散走一旦命負擔者三四人悉以米鹽醢醬之具
實於擔從十數輩直抵里中佛舍下因召集老父十餘
人與之坐遍謂里中賦輸之粗等者吾不復問貧富高
下之大不相當亟言之不言罪且死不實罪亦死既言

之皆筆於書然後取所負米鹽醢醬飽所從而去又一里亦如之凡十數日盡得諸里所傳書因為戶輸之籍有自十萬錢而至於千百者有自千百錢而登於十萬者卒事懸於門莫敢隱匿者是歲前逋負盡入焉宣使駭異之當去復留者凡七載歙州闕刺史府中賓皆願去宣帥衍不遣去以公攝理之用能也累遷京兆府司錄拜侍御史轉膳部員外郎轉運使官會朝廷始置兩稅使俾之聽郡縣授公檢校膳部郎中襄州湖鄂之稅

皆蒞焉且主轉運留務於江陵公乃取一大吏劾其贓其餘渺小不法者牒按之所蒞皆震竦歲餘計奏憲宗皇帝深嘉之面命金紫加檢校職方郎中移治留務於揚子仍兼淮浙宣建等兩稅使尋拜蘇州刺史遷湖南都團練觀察處置使兼御史中丞潭州刺史破壞豪黠除去冗費歲中廩藏皆羨溢憲宗驛召至京城擢拜戶部侍郎判度支不累月會上新即位頃掌內外修奉景陵一日下詔移五鎮幽州鎮州賜錢皆億萬郊天地上

徽名太和公主嫁可汗吐蕃請降使使者往返凡數輩
幽州囚將帥鎮州殺將帥食饗半天下兵自七月至十
二月一出於有司則其供辦之能可知也陛下特加工
部尚書以償之會鳳翔闕節度宰相奏名皆不可上曰
得之矣明日出白麻書以公為檢校禮部尚書兼鳳翔
府尹御史大夫充鳳翔隴州節度觀察處置使先是岐
吳諸山多椽櫨柱棟之材而薪炭粟芻之類京師藉賴
焉負氣勢者名為相市實出於官公則求者無所與由

是負氣勢者相與皆怨恨又無可為毀乃揚言曰以崔之峭削廉隘好是非人士衆不願久為帥陛下一旦問宰相予雖心知其不然然亦惑於衆口卒不能堅辨上意賴上仁聖不受讒乃以公為檢校禮部尚書河南尹是後岐下諸將比比有來者予謂曰公於里閭間吾不復問矣軍怨乎吏怨乎何為謗皆曰舉其一二可知也凡軍之怨怨不均也先是岐之軍食於郡者同一斛食於省者盈一斛馬公乃歲以六十四萬斛皆給盈由是

言之怨乎哉吏之怨怨不厚也先是鄭少師得其人上吏之俸有加焉然而後鄭者輒以所加之俸管於庫其小吏以下未嘗獲一錢公乃悉出所餘命糾掾已下均取之因著令曰自是加俸貯於尅府賞信易取也人人皆便之言者歎憤多出涕理河南不旬月家家自謂有崔尹卒吏無敢入其門識事者皆曰三五十年無是尹都者是歲七月抗疏言臣七十當致仕詞意不可遏朝廷嘉之拜戶部尚書以遂志近世未有心膽既強聲勢

方穩而能自引去者明年春暴疾薨于家予與公更相知善有年矣公氣性剛方理家理身廉儉峻直頗有文章考公之所尚仁孝友愛內外死喪婚嫁之不能自持者莫不已任之嘗以戶部侍郎為其兄乞換一散品致仕官天子憐其意特以太子諭德與其兄至於親戚僚友間無所闕由是議論不能饒借所無者而所無者亦以起畏避之為理尚嚴明勤於舉察胥吏輩始皆難於公然而終卒無大過詞色朗厲若不可支梧然而下

於已者能以理決之無不即時換已見此其所多也銘
曰

勇怯聲佞直特勁正根乎性抑厄病橫者壽景盛由乎
命我以其勁齒與位併銘于子孫用我為鏡

唐故中大夫尚書刑部侍郎上柱國隴西縣開
國男贈工部尚書李公墓誌銘

按李發事魏為橫野將軍申國公十一世而生有唐綏
州刺史明明生太子中允進德進德生昌明令珍玉珍

王生雅州別駕贈禮部尚書震公即尚書第三子諱建
字杓直始以進士第二人試校祕書郎判容州招討事
復調為本官會德宗皇帝選文學公被薦上問少信臣
皆曰聞而不之面唯宰相鄭珣瑜對曰臣為吏部侍郎
時以文入官當校祕書者八其書則馳他人書建不馳
故獨得上嘉之使居翰林中就拜左拾遺會德宗皇帝
崩鄆帥擅師于曹詔歸之公不肯與姑息時王叔文恃
幸異公意不隨卒用公意鄆果怙後一年司直給事府

會朝廷以觀察防禦事授路恕治於廊恕即日就公求
自貳降拜六而後許詔賜五品服供奉殿中以貳馬會
恕復取不宜為賓者公罷去歸為殿中侍御史有詔天
下俟三節來獻先是襄帥均裴獻在邸丞相命俟節以
獻之公力爭不可意作謬官詩尋為員外比部郎轉兵
部吏部始命由文由部而仕者歲得調編類條式以便
觀者罷成勞書凡成否之狀急一月人皆便之遷本曹
郎換兵部郎中知制誥丞相視草時微有竄益遂不復

出樂為少京兆會仲兄尚書遜被口語

高霞寓與吳元濟戰敗言為遜

所撓下遷太子賓客更貶恩王傅

上疏明白出刺澧州入以亞太常於

禮部中覈貢士用已鑒取文章選用多薦說者遂為禮

部侍郎遷刑部權於吏部郎數月一夕無他恙而奄忽

將盡舉族環之請召呪妖巫搖首若不欲者寡嫂至斂

衣若禮焉竟不克言而遂薨年五十八是歲長慶元年

之二月二十有三日也上為之一日不視事以工部尚

書追命之後四月祔先君於鳳翔府某縣某鄉某里實

五月之二十有五日夫人渭源縣君房氏容州濟之女
在太尉瑄為猶孫生五男長曰訥始二十朴恪慤碩次
第馬二女皆十年而下長於議論用體識為文章於朋
友間好盡言然而未嘗以勝負形喜愠進退之際幾微
不苟受官法與操行牢不奪亦未嘗皎皎自辨性潔廉
而沓貪有才者皆進之考行取友甚峻能銖兩人倫而
滔滔者莫見其厚薄終肯延薦人常為諱避其短善承
受得喪故沒身無誕歎之言沒之日會上合百辟宴御

史吏驟聞其喪聞者皆怛然愛惜無異詞公始校祕書
時與同省郎白居易元稹定死生分至是稹與白哭泣
不自勝且相謂曰杓直常自言在江陵時無衣食賴伯
兄造焦勞營為縱兩弟游學不數年與仲兄遞舉進士
並世為公卿而伯兄先杓直歿今杓直復不以疾聞於
許一旦發其喪其兄何如哉許信至果誨其猶子訥曰
爾父有不朽行宜得知者銘吾悲撓不忍為爾其告若
父之執子訥遂來告曰為誌且銘銘曰

日出入安歸今日之日是前日耶非君去此安之念君
夢君兮是君耶非之死信冥冥兮安用銘此為死而尚
可識兮魚膏大夜安忍觀此詞

元氏長慶集卷五十四

欽定四庫全書

元氏長慶集卷五十五

唐 元稹 撰

碑銘行狀

唐故福建等州都團練觀察處置等使中大夫
使持節都督福州諸軍事守福州刺史兼御史
中丞上柱國賜紫金魚袋贈左散騎常侍裴公
墓誌銘

公諱某字某河東聞喜其望也唐故長安縣令諱安期
贈左散騎常侍諱後已贈工部尚書諱邵其父祖其曾
也贈晉陽縣太君王氏其母也故清河縣君房氏其室
也昭應縣令稷虔州刺史懸盤屋縣令及其季也進士
誨進士警其子也辛少穆李堯年陽觀李及其壻也參
軍於彭尉於雒丞於湖城復尉於奉先主簿於太常錄
事於華戶曹於京兆檢校水部員外郎侍御史佐於襄
令於醴泉檢校庫部員外郎侍御史兼中丞團練觀察

於福建其官也中大夫上柱國紫綬金魚其階其勲其
賜也歲某月之某日癸卯某月之某日甲辰某月之某
日其始其薨其葬也某縣某鄉某里之某原其墓也少
好學家貧甘役勞於師雨則負諸弟以往卒能通開元
禮書中甲科在湖城時杖刺史若初寵卒返致若初謝
在華時會刺史故相郢將至舊法盡取行器於人公不
取給官司所有粗陳之其他廉法不撓皆稱是刺史郢
卒以上下考訓之初狀請白京兆尹於陵由是奏為劇

曹掾佐襄時新換帥公為新帥均馳撫其師會衆卒將食舊帥賓公過之不果食既而均至傲狠不用禮公去之在坊時歲旱廩庫空少不數年皆美溢在鄭時朝廷有事淄蔡驢車粟芻一出於鄭均次征役征人用不擾義成節度光顏將出師乞自副且專留事訖師還不絕糧饟義成換帥仍為副皆帶刺史事理鄭凡三年鄭人宜便觀察福建時遠俗佻剽食稅重繁急則散去緩則偷苟持之五載不失所逮其就徵內外以才自許為劇

職者皆開路不幸薨於楊天子聞之罷一日朝降使者

賻粟帛仍以左散騎常侍追加焉予與公姻懿

公繼室
裴氏

相習熟及予來東自謂與公會于途晨涉淮而夕聞其
訃其子誨雅知予有舊因請銘大凡公之行孝愛友順
顯揚前人冬曹晉陽寵備幽室而又勤盡讓不為競爭
官卑時多為官重者所與居重官人皆以經慣吏理為
美談不如是安能富貴其身哉銘曰

實而無文行則不振不有好辭安知令聞我有祿位榮

于子孫亦又記誌其期不泯

故金紫光祿大夫檢校司徒兼太子少傅贈太保鄭國公食邑三千戶嚴公行狀

曾祖方約皇利州司功參軍贈太常少卿祖挹之皇徐州符離縣尉

父丹皇殿中侍御史東川租庸鹽鐵青苗等使贈禮部尚書

某州某縣某鄉某里嚴某字某年七十七

公少好學始以大厯八年舉進士禮部侍郎張謂妙選
時彥在選中不數年補太子正字歷櫟陽尉試為大理
評事福州支使復以監察裏行為宣歙觀察判官轉殿
中兼侍御史充團副加檢校著作郎賜章服入拜尚書
刑部員外郎一年轉太原少尹賜金紫尋加北都副留
守兼御史中丞又加行軍司馬檢校司封郎中特命為
銀青光祿大夫檢校工部尚書河南節度支使營田觀
察處置等使兼太原尹御史大夫北都留守再命加檢

校尚書右僕射三命加金紫光祿大夫檢校尚書左僕射扶風郡開國公食邑二千戶四命加檢校司空始特命至是凡九年朝京師真拜尚書右僕射依前檢校尋以檢校司空拜荆南節度觀察支度等使兼江陵尹御史大夫進封鄭國公食邑三千戶後累歲遷山南東道節度觀察處置支度營田等使兼襄州刺史司空大夫皆如故就加淮西招撫使徵拜太子少保依前檢校司空換檢校司徒兼太子少保判光祿卿事復換太子少

傳依前檢校司徒疾告久之有司上言百日不視事當
絕俸特詔有司無絕俸長慶二年五月二十七日薨於
家上為一日不聽朝詔贈太保出內帑以贈賻之恩有
加也初貞元中宣歙觀察使劉贊以公勤信精盡深所
委異十年之間政無細大一以咨之及贊府除掌贊餘
務德宗皇帝善公之所為是有刑曹之命且欲任用焉
會太原節度使李說嬰疾曠廢遂命副助之其實將代
說矣公事說愈謹待下愈謹及說薨而人人皆願為帥

德宗皇帝因人焉元和初楊惠琳反於夏公上言曰陛下新即位惠琳不誅威去矣臣請偏師斷其頭優詔許之公乃秣芻以載於車祗糧以曝於日齎輓輕重人利百倍惠琳誅是有金紫大夫尚書左揆開國扶風之命焉明年賊闢劫蜀兵以叛詔公分師以會伐今司空光顏將往會公乃悉出帳下衛以驍果之柄以付之然後豐其資賞副以兼乘涉棧道者五千餘騎人無徒步而進者焉有羨力兵不勞困蜀人駭竄自我功為多役罷

是有檢校司空之命焉公之始帥太原也內外乘馬不
過千餘匹三年皂而秣之者六千匹出之於野者以萬
數及命十不失一二焉嘗大閱於并城東種落畢會旗
幟滿野周迴數十里不絕時田鵬梅綠將軍來在會聞
金鼓震伏其在江陵也蠻酋張伯靖殺長吏劫據辰錦
諸州連九洞以自固詔公討之公上言曰緣谿諸蠻狐
鼠踰竄王師步趨不習嵌嶮沂水行舟進寸退里晝不
得戰夜則掩覆攻實危道招可懷來臣今謹以便宜未

宣討詔先遣所部將李志烈齎書諭旨俟其悛心不十
餘日伯靖果以隸黔六州之地乞降于公天子褒異一
以委公公命志烈復往伯靖遂以其下舒秀和等來就
戮詔公皆署麾下將以撫之由是六州平而伯靖亦卒
為我用荆俗不理室居架竹苫茅卑庠褊逼風旱摩憂
煬然自火公乃陶瓦積材半入其直勉勸假借俾自為
之數月之間屋閭如化災害減少人始歌之及朝廷有
淮蔡之師乃命公為襄陽節度以招撫之既至再旬而

王師濟漢器械車徒皆若素具俸秩廩祿一以資軍公
之大槩推誠孚下善用人之所長故誅琳破闡柔伯靖
秀和皆談笑指麾而人人自輸其効理身理家和易孝
敬親喪不自愛事兄嫂有過人者前後四顯親而先府
君位尚書先夫人封號國朋友姻戚泳游於德宇者如
歸焉自始建府選將開幕壁於今纔二十年矣目擊為
將相者逮不肖凡九人焉其餘從公而同奉朝請者可
知矣公之先自兩漢至隋氏郡守列侯駙馬御史郡丞

將軍刺史著作郎數百年冠冕不絕代若公之出入更踐位與壽極其上無如也高祖協貞觀中文皇征遼為海東運糧使洮州都督自高祖至王考禮部府君為政皆嚴明無趨避初府君為松滋江陵令恃豪賴軍目氣勢者比比皆杖殺邑人相與刻石歌詠之先是開元天寶間安之尉京劇挺之更右職破壞豪黠如神明至是挺之子武伯府君又著稱有唐言劇斷者先嚴氏焉自公始用儒素謙廉見推於早歲及為大官益自勞謹貴

貴尊尊而哀賤下於已者雖走胥負卒幼子童孫終不
得聞辱詬之言而窺怠墮之容矣用是享年七十七仕
五十年一為尚書三歷僕射六兼大夫五任司空再踐
司徒三居保傅階崇金紫爵極國公荆并襄皆天下重
地也繼為統帥者十有四年前後奏名刺率百辟以慰
慶吉凶者凡八載然而褫免之謂不聞於耳憂悔之緒
不萌於心非夫上取信於其君下取信於其友權近不
疑於畏逼我旅賴我以安全其孰能如此哉詩所謂終

溫且惠淑慎其身於實敢信備錄聞諸有司謹狀上尚
書考功稹從贊無狀孤負明恩天付郡符官未稱責日
夜憂畏豈暇為文無何太保公諸子以稹門吏之中恩
顧偏厚且狀官闕且計日時願布有司以旌懿行其間
親承講貫子孫不得而聞者往往漏略恐他人纂撰益
復脫遺感念曩懷遂書行實其所行事由荆而下皆所
經見由荆而上莫非傳信飾終定謚期在至公謹狀

元氏長慶集卷五十五

欽定四庫全書

元氏長慶集卷五十六

唐 元稹 撰

碑銘

唐故使持節萬州諸軍事萬州刺史賜緋魚袋

劉君墓誌銘

歲長慶之癸卯五月日乙亥處士祿汾以予友保極喪
訃於予且告保極遺意欲予誌卒葬予哭泣受妻子賓

友弔又哭泣退叙事保極諱頗姓劉氏漢燕王子孫之
在其國者皆稱昌平人後世有清夷軍使極為清夷軍
使時會侯希逸叛遼海側近軍郡守將皆棄走極獨不
棄軍軍亂害及極朝廷忠之以平州刺史告其弟平州
生表裏表裏官至深州長史亦用忠戰死於軍長史生
子騫子騫官至銀青光祿大夫唐州刺史與周增等謀
潰李希烈覺皆殺之君實唐州之長子希烈不忍其幼
養之麾下凡攻戰必攜去年十四五始讀書希烈死得

脫舉進士文詠詞調有古時人氣候不肯學感感近一
題者試一不中遂不復試復田於唐唐刺史願得君為
壻君不願為刺史壻刺史怒暴租其田君乃大集里中
諸老曰刺史謂田足以累我耶由是火其居出契書投
火中盡畀諸老田棄去汝上讀書賦詩厚自期待刺史
陸長源器異之三十餘試授祕書省校書郎復以協律
郎從事於鄜元和初高崇文方下蜀宰相杜黃裳以君
為大理評事畫於軍後為壽安主簿適烏重肩以懷汝

之師來伐蔡請君為監察御史判懷汝營田事尋改節度判官賜章服是時賊始盛陳許懷汝之衆怯怯未振舉都統韓弘在大梁君乃請於烏曰青陵故城地高要得之可以據賊矣公能使我於韓可以得烏使之韓一見竒之竟夕與語遂命陳許懷汝大梁之衆據青陵剋日遂據之自是官軍乃大振凡烏之戰陣謀取案牘書奏之事皆咨之嘗為烏啟事京師憲宗皇帝語及陣法曰卿何以知戰對曰臣固淮西之戰者也讀書餘事耳

遭太夫人喪服闋以從來所賦詩投宰相令狐楚楚屢
吟賞於有文章者宰相段文昌在蜀時愛君之磊落善
呼吸人遂相奏天子以君為殿中侍御史銀州長史知
刺史事先時銀之長不命於朝數十年矣諸將攝理奪
其馬牛夷人苦益復叛遠君始受命指羸輸之白四足
者謂予曰君為我識之此馬苟無死不復易矣至所治
党項諸羌來會聚君告以忠信廉儉皆出涕無敢違告
者歲餘受代酋長拓拔建宗等七百餘衆遮擁不欲去

君馳去之建宗等稍稍隨至境界以羸輸之白四足者
歸京師自外無餘畜及君之歿諸羌之長不絕聘尋授
河西令侍中弘方在蒲得君喜甚因請自貳朝廷以水
部員外郎兼侍御史充河中節度副使又歲餘君所善
元稹為宰相朝謂君曰君將展矣亟薦之稹竟不能用
尋除萬州刺史病於汝竟以長慶三年某月日卒所寓
年若干以某月日葬某所君五男二女李氏婦洎處子
皆女也統明既明越明坎明總明皆男也處士祿汾始

終視其喪始君善交人凡氣志豪健尚功名者多師之
投分誓且死為牧長用慈儉閭里皆愛惜少為陸尚書
長源李尚書元素鄭司徒餘慶杜司空黃裳所知羣公
更處重位君亦不能遂所欲烏之知且委也事以喪廢
韓之器且薦也卒不獲用命也已予為監察御史時始
與君更相許與為將相予果為相而不能毫髮加於君
非命也予罪也抑不能專善善惡惡之柄耶不然何二
世死忠之家既生如是之傑而卒不能成就之嗚呼銘

曰

氣成鬱噎必為風雲有志不洩死當能神神固不昧故
吾有云天子思我朋嫉我思雖我賴感我心不泯誓致
堯舜封山侍巡慟告君墓報君知人

唐故工部員外郎杜君墓係銘

并序

敘曰予讀詩至杜子美而知小大之有所總萃焉始堯
舜時君臣以賡歌相和是後詩人繼作歷夏殷周千餘
年仲尼緝拾選揀其干預教化之尤者三百其餘無聞

馬騷人作而怨憤之態繁然猶去風雅日近尚相比擬
秦漢以還採詩之官既廢天下妖謠民謳歌頌諷賦曲
度嬉戲之詞亦隨時間作逮至漢武賦相梁而七言之
體具蘇子卿李少卿之徒尤工為五言雖句讀去聲文律
各異雅鄭之音亦雜而詞意簡遠指事言情自非有為
而為則文不妄作建安之後天下文士遭罹兵戰曹氏
父子鞍馬間為文往往橫樂賦詩故其抑揚寃哀悲離
之作尤極於古晉世風槩稍存宋齊之間教失根本士

以簡慢歛習舒徐相尚文章以風容色澤放曠精清為高蓋吟寫性靈流連光景之文也意義格力無取焉陵遲至於梁陳淫艷刻飾佻巧小碎之詞劇又宋齊之所不取也唐興官學大振歷世之文能者互出而又沈宋之流研練精切穩順聲勢謂之為律詩由是而後文變之體極焉然而莫不好古者遺近務華者去實効齊梁則不逮於魏晉工樂府則力屈於五言律切則骨格不存閒暇則纖穠莫備至於子美蓋所謂上薄風騷下該

沈宋古傍蘇李氣奪曹劉掩顏謝之孤高雜徐庾之流
麗盡得古今之體勢而兼昔人之所獨專矣使仲尼考
覈其旨要尚不知貴其多乎哉苟以為能所不能無可
不可則詩人以來未有如子美者時山東人李白亦以
奇文取稱時人謂之李杜予觀其壯浪縱恣擺去拘束
模寫物象及樂府歌詩誠亦差次肩於子美矣至若鋪
陳終始排比聲韻大或千言次猶數百詞氣豪邁而風
調清深屬對律切而脫棄凡近則李尚不能厯其藩籥

況堂與乎予嘗欲件拆其文體別相附與來者為之准
特病癩未就適子美之子子嗣業啟子美之柩襄祔事
於偃師次于荆雅知予愛言其大父為文拜予為誌辭
不可絕予因係其官闕而銘其卒葬云係曰

晉當陽成侯姓杜氏十世而生依藝令於鞏依藝生審
言審言善詩官至膳部員外郎審言生閑閑生甫閑為
奉天令甫字子美天寶中獻三大禮賦明皇奇之命宰
相試文文善授甫曹屬京師亂步謁行在拜左拾遺歲

餘以直言失官出為華州司功尋遷京兆事旋又棄去
扁舟下荆楚間竟以寓卒旋殯岳陽享年五十九夫人
弘農楊氏女父曰司農少卿怡四十九年而終嗣子曰
宗武病不克葬歿命其子嗣業嗣業貧無以給喪收拾
乞匄焦勞晝夜去子美歿後餘四十年然後卒先人之
志亦足為難矣銘曰

維元和之癸巳粵某月某日之佳辰合窆我杜子美於
首陽之前山嗚呼千歲而下曰此文先生之古墳

元氏長慶集卷五十六

欽定四庫全書

元氏長慶集卷五十七

唐 元稹 撰

碑銘

唐故朝議郎侍御史內供奉鹽鐵轉運河陰留
後河南元君墓誌銘

有魏昭成皇帝十一代而生我隋朝兵部尚書府君諱
某後五代而生我比部郎中舒王府長史府君諱某君

即府君之第二子也諱某字玄度娶清河崔鄰女生四子長曰易簡滎陽尉次從簡曲沃尉次行簡太樂丞幼弘簡長女適劉中孚中孚早卒次嬰疾室居次適蘇京舉進士次適李殊殊妻早夭君始以恒王參軍附太學治春秋中授左清道府錄事參軍歷湖丞秩罷丁比部府君憂服闋調興平長安萬年尉丁滎陽太君憂服闋除萬年丞遷監察御史知轉運永豐院事殿中侍御史留務河陰加侍御史賜緋魚袋元和十四年以疾去職

九月二十六日歿於季弟號州長史榘之官舍嗚呼我
尚書府君有大勲烈於周隋氏我比部府君積大學行
搢紳間我諸父法尚嚴家極貧而事事於喪祭賓客雖
帚除薪水不免於吾兄貞元初蝗且儉我先太君白府
君貸女奴以足食君泣曰太夫人專門戶不宜乏使令
取新婦氏媵婢以給貸向是三十年養育八男女始元
和中乃復奴婢之籍焉先府君叢集羣言裁成百葉書
抄君懼不得授乃日一食以齋其心者一月先太君憐

而請焉由是盡付其書是歲貨婢足食之一日也日一粥而課寫千言三歲乃卒業先府君棄養之歲前累月而季父侍御史府君捐館予伯兄由官阻於蔡叔季皆十年而下遺其家唯環堵之宮耳皆曰貨是以襄二事可也君跪言於先太君曰斯宇也尚書府君受賜於隋氏乃今傳七代矣敢有失守以貽太夫人憂死無以見先人於地下由是匍匐乞以終其喪自興平長安萬年尉俸不過三四萬然奉顏色潔禘祀備吉凶來賓客無

遺馬均也已雖遊千里貿費毫釐未嘗不疏之於書還
啟先太君下示仲叔季且曰尊夫人慈不我責不如是
自束陷不義矣其在于京邑專捕盜者八年破囊橐掘
盤牙不可勝數莫不刑者不懇強者不暴其在河陰也
朝廷有事於淄蔡累百萬之費一出於是朝令朝具夕
發夕至者周五星歲而後功成役罷凡主供饋之百一
於君者皆以課遷唯君終不言賞賞亦不及嗚呼君之
生六十七年矣四十年事親無一日之怠三十年養下

無一詞之倦撫諸弟無正色之訓而亦不至於不恭教諸子無鞭笞之責而亦不至於不令以閒處劇而更不忍欺以直立誠而忤不及物沒之日三子不侍無一言之念知叔季之可以教姪也室空牆壁無一顧之憂知叔季之可以任喪祭也嗚呼愛我者張仲知我者鮑叔予生幾何懼不克報或不忘記之斯文銘曰

唐元和之己亥惟孟年十一月十六日仲月之良辰合葬我元君于咸陽縣之洪瀆川從先太君之後域而共

閔于夫人崔之墳

唐故建州蒲城縣尉元君墓誌銘

君諱某字莫之有魏昭成皇帝十七世而生某官某君
即某官之次子也少孤母曰渤海封夫人提捧教訓不
十四五其心卓然讀書為文舉進士每歲抵刺史以上
求與計去且取衣食之資以供養意義漸聞於朋友間
無何宗姪義方觀察福建子幼道遠自孤其行拜言勤
求請君俱去太夫人曰吾有爾兄養足矣爾其遂行旋

授建州浦城尉宗姪之心腹耳目之重以至閨門之令
盡寄於君上下無怨誠且盡也又無何宗姪觀察廊坊
君亦俱去心腹耳目之寄皆如初宗姪歿子公慶號駭
迷謬無所據君自始至卒任持之公慶事公雖及喜愠
不敢專元和中君封夫人喪痛毒哽咽結氣膏肓既喪
遂卒不散十五年八月二日終於京城南享年五十八
公慶襄其事夫人濮陽吳氏賢善恭幹生一女女亦惠
和天君前累月嗚呼吳夫人可謂生人太苦矣予與君

伯季之間十歲相得師學然諾出入宴游無不同也及
逾三十年予亦竊位偷名官進不已然而終無濡縷之
力及於君君何足悲適自悲耳銘曰

維元和庚子十一月之四日禽交加六神没于嗟元君
歸此室

欽定四庫全書

元氏長慶集
卷五十七

元氏長慶集卷五十七

欽定四庫全書

元氏長慶集卷五十八

唐 元稹 撰

碑銘

夏陽縣令陸翰妻河南元氏墓誌銘

陸氏姊事父母以孝聞事姑如事母善伯以悌順如事兄睦族以惠和煦下以慈愛四者謂之吉德然而不壽也嗚呼享年三十有一歿世於夏陽縣之私第是唐之

貞元二十五年十二月初五日也冬十月十有四日
葬於河南洛陽之清風郡平樂里之北邙原從祖姑兆
上永貞之元年歲乙酉朔旦景申辰在己酉須時順也
始祖有魏昭成皇帝後失國今稱河南洛陽人焉六代
祖諱嚴在周為內史大夫以諫在隋為兵部尚書昌平
公中古君子曰忠之後必復降五世而生我皇考府君
府君諱某以四教垂子孫孝先之儉次之學次之政成
之當乾元廣德之間郡國多事由雲陽昭應尉馮翊猗

氏長遷于殿中侍御史或未環歲或未浹時而五命自天非夫公不來則人不蘇公不遷則善不聳何是之速也董芳書奏議者凡八人其在比部郎中也宗人得罪有不察夫玉與珉類而不雜者屈我府君為號州別駕累遷舒王府長史至則懸車息休宴如也嘗著百葉書要以萃羣言祕牒一開則萬卷皆廢由是懼夫百氏之徒一歸於我囿所不樂也故世莫得傳焉德業至矣不峻其位不流其化時哉時哉我外祖睦陽鄭公諱濟官

族甲天下我太夫人聖善六姻咸重焉以憫默哥婢僕
傭保以莊勵為鞭笞用至於兒稚不能夏楚而嗃嗃於
他門肆我伯姊穆其嚴風柔以慈旨於人為克肖矣生
十四年遂歸於吳郡陸翰翰國朝左侍極兼宰相信之
玄孫臨汝令祕之元子魏出也魏之先文貞有匡君之
大德翰少孤事親以至行立釋褐太平主簿我姊由是
而歸之逮陸君之宰夏陽也事姑垂二十年矣姑愛之
若慈母婦敬之若嚴君雖母兄之饋不投於姑則不至

而況於私其財乎閨門之內未嘗以往復之言聞婢僕而況於相色乎及太夫人之沈痼也夫人亦不利行有年矣然而藥不嘗於口則不進衣不出於手則不獻冬之夜夏之日環侍其側者二三歲衣不釋體倦不形色曾不以已之疾為瘡矣嗚呼閔之養其親也方於此何如吾不知也至於陸君之在疚也克哀敬以終養之舊疾暴加不數日而不作陸君縻職他縣至則無及矣將訣之際子號女泣問其遺訓則曰吾幼也辭家報親日

短今則已矣不見吾親親乎親乎西望而絕痛夫孝於親敬於姑順於夫友於兄弟辭世之日母不獲撫夫不及決兄不得臨弟不得侍天乎淑善反以為罪乎二女曰燕曰迎兩男師道嶠夫人兄沂兄秬弟積弟楨或游遠或守官或歸養皆不克會葬陸君先是職于使又不克董喪從父季真以二子襄事禮也後尊夫有命于小子楨曰吾大懼夫馨香之行莫熾于後爾其識之是用銜恤隕涕篆銘于壙銘曰

嗚呼有唐陸氏孝夫人元氏之墓

唐左千牛韋珮母段氏墓誌銘

唐少保贈僕射韋公幼子左千牛珮母曰武威段氏故
衢州司田叅軍岌之弟二女也其四代祖褒國公揚州
都督贈輔國大將軍生曾祖宣州長史諱弘珪生大父
廊州刺史諱懷本先是僕射裴夫人早世女抱子幼思
所以仁之者命主養之始長安令至於都留守持門戶
主婚嫁者殆十五歲當貴大之家處謙謙之勢然而不

怨不德禮得其宜信難矣今僕射喪益不失非盛勳烈
之後其孰能如此哉元和四年九月十九日暴疾終于
履信第享年四十定其年十二月二日葬于河南縣龍
門鄉之午橋村凡韋氏之族姻聞其喪莫不親者悲疎
者歎不亦善處其身哉故僕射諸子洎諸女皆服兄弟
之母服而哀有加焉始予亡妻生不月而先夫人歿免
水火之裁成習柔之性用至於粧櫛針組書誠琴瑟之
事無遺訓誠有以賴焉是以予妻之言於予曰離則思

思則夢夢則悲疾則泣戀戀然予不知其異所親矣決
予之際切以始終於敬為託焉今日之誌其終乎銘曰
母以子貴貴必因人人本乎祖祖盛厥勲昔我稚室懷
其仁仁莫之報沒沒而有云今復泯矣報之斯文

葬安氏誌

予稚男荆母曰安氏字仙嬪卒於江陵之金隈鄉莊敬
坊沙橋外二里嫗樂之地焉始辛卯歲予友致用憫予
愁為予卜姓而授之四年矣供侍吾賓友主視吾巾櫛

無違命近歲嬰疾秋方綿痼適予與信友約浙行不敢私廢及還果不克見大都女子由人者也雖妻人之家常自不得舒釋況不得為人之妻者則又閨衽不得專妬於其夫使令不得專命於其外禮儀不得以尊卑長幼之序加於人疑似逼側以居其身其常也況予貧性復事外不甚知其家之無苟視其頭面無蓬垢語言不以饑寒告斯已矣今視其篋笥無盈餘之帛無成襲之衣無帛裏之衾予雖貧不使其若是可也彼不言而予

不察以至於其生也不足如此而其死也大哀哉稚子
荆方四歲望其能念母亦何時可成立則不能使不知
其卒葬故為誌且銘銘曰

復土之骨歸天之魂亦既墓矣又何為文且曰有子異
日庸知其無求墓之哀焉

元氏長慶集卷五十八

欽定四庫全書

元氏長慶集卷五十九

唐 元稹 撰

祭文

告贈皇考皇妣文

嗣子稹等謹以常饌嘉蔬之奠敢昭告于皇考贈右散騎常侍皇妣贈滎陽郡太君今皇帝二月五日制書澤被幽顯小子稹參奉班滎得用封贈越七月二十八日

乃詔先夫人曰滎陽郡太君洎八月之九日復詔先府君曰右散騎常侍祇命隕越哀號不逮追念顧復若亡生次惟積洎稹幼遭閔凶積未成童稹生八歲蒙駭孩稚昧然無識遺有清白業無樵蘇先夫人備極勞苦躬親養育截長補敗以禦寒凍質價市米以給晡旦依倚舅族分張外姻奉祀免喪禮無遺者始從兄集得尉興平然後衣服飲食之具粗有准而猶卑薄儉貧給不假足慈訓備至不肖乃立積初一命稹始奉朝供養未遑

奄爾遺棄疊罪不死重羅纓裳遷換因循遂階榮位大有車馬豐有俸秩書扇雖存舊老已盡顧是所有將焉用之嗚呼生我者父母享此者妻子勤頓者兄嫂優餘者婢僕追孝不過於一奠薦寵不過於揚名哀哀劬勞亦又何報摧圯殞裂酸傷五情謹於先太君載誕之日祇告贈典并焚黃制以獻號慕及痛肝心伏惟尚饗

告贈皇祖祖妣文

孝滌稹敢昭告于皇祖陳州南頓縣丞贈尚書兵部員

外郎府君祖妣贈晉昌縣太君唐氏惟元統運嘗宅區
夏選諫賢善俾公彭城公實能德延于後嗣降及兵部
為隋巨人抑揚直聲扶衛衰俗戶部績紹傳于魏州蘊
鬱懿粹族用繁昌始兵部賜第於靖安里下及天寶五
世其居冕昇駢比罷列省寺一日秉朝政者凡十四五
叔仲伯季姊妹諸姑洎友壻彌孫歲時與會集者百有
餘人冠冕之盛重於一時燕寇突來人士駭散蔭籍腹
削龜繩用稀我曾我祖仍世不偶先尚書盛德大業屈

於郎署小子稹蒙幸餘福據有方州今皇帝嗣位之初
澤被幽顯尚書府君洎滎陽郡太夫人當進封贈小子
稹伏念先尚書嘗以此部郎乞換追命朝列不許大孝
莫申是用追述先志乞回恩於祖父祖妣是歲八月十
八日詔以兵部員外郎晉昌縣太君來告第摧慕感咽
五情傷殞謹以仲冬日至修奉常薦焚獻制書昭告神
几伏惟尚饗

告祀曾祖文

孝曾孫稹謹以清酌庶羞之奠敢昭告于曾祖岐州參軍府君禮稱祔禘蒸嘗一歲用是四者而已唐制位五品皆廟祀廟祀亦以求吉日其餘未廟祀者各奉家傳疎數每異昔我先府君深惟孝思終已不怠每歲換正至涉佳辰覩兒孫賓遊相會聚未嘗無悲是用日至暨正旦仲夏之五日季秋之初九莫不修奉祠祀以達事生之意焉逮小子稹冒華官榮當立廟以事先人於京師會值譴出未果修構宗子積牧民於金復不克以上

牲陪祀每衣裘葛酸傷五情今謹依約廟則每歲以二
至二分暨正旦與宗積彼此奉祀於治所始用變禮不
敢不告伏惟尚饗

告畬三陽神文

維年月日通州司馬稹用肴酒為州人告于畬三陽之
神圖籍鐫載耆父傳述通之盛時戶四萬室耕稼駢綴
謠謳湧溢闔珠玉樓雉丹漆孝順子孫廉能吏卒軒
然神功坐受嘉粟政式不度人用不謐奪富撓豪軋窮

役疾弱者通播悍者憤怫饑饉因仍盜賊倉卒間落焚
燔城市剽拂人民遂空萬不存一神居毀蕩神氣蕭颯
再完陋宮榻不容膝僅有難殽無復芬苾豺虎號噪麋
鹿幽噎厲鬼瘴人貪吏殄物闐閭丘墟門戶蒿草神又
何情受人祈乞嗚呼罔天軸地羅星走日水火炎潤原
隰生出古不獨加今不獨屈化由人興胡不為率我貳
茲邑星歲三卒熟視民病飽聞政失自喪守後月環其
七弊深力薄未暇纖悉都虛虛持先後排比附防風俗

簡用紀律功不甚農虛不勝實乃勸州人大課芟鉅人
人自利若受鞭秩旋六十里功旬半畢嗚呼教則人功
理有陰陽農勸事時賞信罰必市無欺奪吏不侵軼非
神敢煩在我有術雷蟄雨枯蒸頑曝鬱引導百來呵厲
四逸非我敢知有神之吉惟我惟神各恤其恤神永是
邦我非常秩繼我者誰為神斯慄尚饗

告畬竹山神文

稔聞天好平施而特累山嶽許其嵩崇聖王亦視之公

侯不惜牲幣蓋以其鎮定區宇舒貯風雲毓櫟櫨棟礎
洎百穀萬貨以資養於人也至於蒙翳蒼羅惡木穴窟
虺蜥虎豺迎礙吞噬以遂其高傲堅頑之勢非天意也
按通之載號神為名山川且邇邑屋而扶道途然而不
砢不穫不礎不柱叢集魑蟒蔽弊道路將五十年矣實
人力之不足於山也非神之過今天子斬三叛之明年
通民畢賦用其閒餘夾津而南開山三十里為來年農
種張本自十月季旬周甲癸而功半就郡司馬元稹率

屬攸置酒肴以告于神曰通之邑居纔二百室一旦為神翦翳穢戮豺狼幅員六十里之地亦足為用力於神神其戒哉敬用嘉祝祝曰為山輸力為民豐食廩以萬億蠹賊以殛報用黍稷謚用正直播布不殖淫厲不息風雨不忒假廩不比俾民無得將他山是嗇棄神之域為神之羞永永無極神其畏哉尚饗

報三陽神文

維年月日文林郎守通州司馬權知州務元稹謹遣攝

錄事參軍元叔則以清酒庶羞之奠以報于三陽神之
靈越九月始踐朔霖雨既旬式從榮典俾吏拜稽首祈
三辰克霽于神神初饗若不踰祈幽妖靈虺不克庶負
輸穫熟者賴神之仁仁必報式備報典不敢諛伏惟尚
饗

祈雨九龍神文

積始長慶二年夏六月相天子無狀降居于同愁慙焦
勞求念隱思有以報陛下莫大之恩涉歲于茲理用不

效冬不時雪春不時雨越二月宿麥不滋耒耜不刺大
懼茲歲患成于人以羞陛下之獎寄刻責罪悔罔識攸
由凡天降庇厲必因於人豈予心之虛削孤獨依倚氣
勢耶將予刑之僭濫失所寃哀無告耶或予政之抑塞
和令開洩閉藏耶舉動云為罔不在我神怒天譴降災
于我身我不敢讓今夫蠢蠢何罪物物何知使不肖者
長理而災害隨至無乃天之降罰不得其所耶痛毒惻
怛無所赴露惟龍司水于同同人神之謹齋戒沐浴叩

首揮淚願以小子稔為千萬請命于龍龍其鑒之克三日雨我田疇其有以報不然災于予身亦足以謝伏惟尚饗

報雨九龍神文

同州刺史元稹謹以清酌庶羞之奠敬祭于九龍之神是月己巳刺史稹以二從事蒙受塵露百里詣龍為七邑民赴訴不雨予固慙惻言訖涕下親為龍言龍意享若是夕而應庚午而降辛未而洽癸酉而飮甲戌而霽

乙亥而報報典不渝龍祐宜永訖是嘉穀勿旱勿靈歲
其有成無忘龍德尚饗

元氏長慶集卷五十九

欽定四庫全書

元氏長慶集卷六十

唐元稹撰

祭文

祭淮瀆文

維元和九年歲次甲午十二月朔甲辰某日辰使謹遣
某用少牢醴酒之奠昭禱于淮瀆長源公之靈浩浩靈
源滔滔不息流謙順處潤下表德清輝可鑑浮穢不匿

月映澄鮮霞明煥絕經界區夏左右萬國百川委輸萬
靈受職越海貢誠載舟竭力明哲用興凶戾潛殛渺爾
吳頑蔑然蝨賊鴟張蔡郊蟻聚淮側喪父禮虧干君志
愎天子命我滌除妖慝卒乘桓桓戈鋌嶷嶷電淬爪牙
雷憤胸臆王心示懷士剪猶抑柔叛布衷取順捨逆咨
爾有神逮爾有極彼暴我仁彼枉我直歸我者昌倍我
者闕不斬祠祀不湮溝洫不殄渠魁不虐畏逼不進梯
衝不耀矛戟火滅燎原人歸毒域然後潔神牛羊奉神

黍稷告神有成謂神不惑尚饗

祭翰林白學士太夫人文

維元和六年七月某日文林郎守江陵府士曹參軍元稹謹遣弟某姪男祇酌捧饌敢昭告于白氏太夫人之靈嗚呼分同伯仲古則拜親既陪長幼之列遂生骨肉之恩禮由情展情以義殷情至則爾豈獨古人況稹早歲而孤資性疎愚既不得為達識者所顧亦不願與順俗者同趨行過二十塊然無徒及太夫人令子藝成學

茂德馨一舉而塞芳蘭署再舉而振藻彤庭愚亦乘喧
濫吹謬列莖英跡由情合言以心誠遠定死生之契期
於日月可盟誼同金石愛等弟兄每均捧檄之祿迭慶
循陔之榮用至於二門之童孺莫不達廣孝之深情逮
稔謫居東洛泣血百歸無天可告無地可依喘息將盡
心魂已飛太夫人推濟壑之念憫絕漿之遲問訊殘疾
告諭禮儀減旨甘之直續鹽酪之資寒溫必服藥餌必
時雖白日屢化而深仁不衰天乎是感人乎詎知不幸

餘生苟活重戴冠纓再展升堂之拜旋為去國之行嗟
澤畔之云幾奄天禍之無名朋友計告慰問縱橫猶恍
恍而期悞忽浪浪而淚盈處衆憫默入門屏營移疾於
趨府之辰孰知潛慟視惟幼女在側無處言情行吟倚
歎夢哭魂驚往往不寐晨鐘坐聽豈由禮而當爾蓋感
深之所縈嗚呼仁之莫報哀不得申緬太夫人以猶在
感今古之同塵嗚呼哀哉太夫人族茂簪纓仁深聖善
勵諸子以學故大被擇隣示諸子以正故寸葱方判保

參不疑戒軻非淺仲則金鑒之英季則蓬山之選豈非
因地而德所貴飭躬而顯何昊天之不弔罔終惠於哲
人既生賢與種德何顛顛之相因見聚螢而肄業知織
縷之嘗勤猶將期於萬石曾不待夫重茵嗚呼哀哉誰
非顧復我實酸辛疾有萌漸禍無因緣哀感行路況乃
令子之交親雖千詞之稠疊終萬恨之莫陳嗚呼哀哉
伏惟尚饗

祭禮部庾侍郎太夫人文

外孫女甥朝議郎守尚書祠部郎中知制誥元稹謹以
清酌嘉蔬之奠敢昭告于庾氏太夫人扶風郡太君韋
氏之靈赫赫韋門祁祁騫騫南山峻峙洛澤清源公卿
委累賢彥駢繁金玉不耗芝蘭有根厥生孟母德盛教
尊訓下以順睦族以姻猶子猶女惟弟惟昆至者處者
終無間言他族之長豈無豐溫自我均養人用不怨佛
氏有云世火焚燔慧劍斷網摩尼照昏淑心獨得深入
妙門嗚呼良人早世素業空存教侃以義為軻避喧教

自髻鬢成于冠婚鬱為重器瑚璉璠璣南北臺省東西
掖垣更踐迭處以慰朝昏孝女視膳令婦執笄封燔茅
社抱弄荃蓀陔蘭始茂隙駟俄奔神不可憑天何足論
嗚呼哀哉白日入地畫翼羅軒燭燎宵燼銘旌曉翻望
望踰閩遲遲改轅佳城故兆風樹秋原哀子泣血行人
斷魂稊也幼婦時惟外孫令姓異縣謫任遐藩升堂不
及執紼空敦伏讀哀誄跪薦芳罇辭訣有禮悽愴無垠
嗚呼哀哉尚饗

祭亡妻韋氏文

嗚呼叙官閣誌德行具哀詞陳薦奠皆生者之事也於
死者何有哉然而死者為不知也故聖人有無知之論
嗚呼死而有知豈夫人而不知予之心乎尚何言哉且
曰人必有死死何足悲死且不悲則壽夭貴賤縗麻哭
泣藐爾遺稚感然鰥夫皆死之末也又何悲焉况夫人
之生也選甘而味借光而衣順耳而聲使心而使親戚
驕其意父兄可其求將二十年矣非女子之幸耶逮歸

于我始知賤貧食亦不飽衣亦不溫然而不悔于色不
戚于言他人以我為拙夫人以我為尊置生涯於獲落
夫人以我為適道捐晝夜於朋宴夫人以我為狎賢隱
于幸中之言嗚呼成我者朋友恕我者夫人有夫如此
其感也非夫人之仁耶嗚呼歔歔恨亦有之始予為吏
得祿甚微當日前之戚戚每相緩以前期縱斯言之可
踐奈夫人之已而况攜手於千里忽分形而獨飛昔慘
淒於少別今永逝與終離將何以解予懷之萬恨故前

此而言曰死猶不悲嗚呼哀哉惟神尚饗

祭亡友文

嗚呼英英君子汲汲仁義壽則道亨天亦德熾滔滔衆
人沒沒名利材不稱官老不識事紫綬榮身黃髮垂穗
徒擲天年竊耀名器石頑慧明亦有何貴君雖促齡實
大其志呼吸風雲擺落塵膩泥濇珠玉糞土名位瞪目
凡流傾心俊異譽如不聞毀亦不忌不求近効直詣殊
致圜檻豺狼籠御鵬驥塹山堙海吞呵噴渭嶽立英髦

粉碎庸媚德我者煌煌虐我者惴惴赫赫其門揚揚其
氣念昔日之盡言此唯君之大意天不降年志亦沒地
我輩尤在尚可希冀故曰交本乎道道通乎類身沒類
存道則不墜信後圖之未忘奈目前之歔歔昔江漬之
送君每重宵而疊醉曾不易其津涯忽莫陳於喪次孀
婦號呼哀眉提稚拜我者曩日之舊童示我者絕時之
遺字埋萬恨於深心洒終天之別淚嗚呼哀哉尚饗

元氏長慶集卷六十